



Sesida dals

15 d'october 2024

Communitgà ils

16 d'october 2024

Protocol nr.

796/2024

Dumonda Cahenzli-Philipp (Vaz Sut)

concernent plazzas d'assistenza en famiglias da tgira

Resposta da la Regenza

Tar la dumonda 1: Las famiglias da tgira en il Grischun retschaivan uffants ubain per ina tgira permanenta u sco intervenziun en cas da crisa. Ultra da quai datti famiglias da tgira che tgeran – sco mesira da distgargia – uffants durant fins d'emna e durant las vacanzas. L'Uffizi chantunal dal servetsch social examinescha la qualificaziun da las famiglias da tgira e conceda las permissiuns. Plinavant ha l'Uffizi dal servetsch social er l'incumbensa da survegliar e da cussegljar las famiglias. Intginas famiglias da tgira fan part d'ina organisaziun per il plazzament d'uffants en famiglias e vegnan accompagnadas là da persunas spezialisadas. L'activitad sco famiglia da tgira sa basa sin l'interess e sin la prontezza voluntara da las famiglias.

En il cas da la collocaziun d'in uffant ordaifer la famiglia èsi impurtant da tscherner la purschida adattada. I vegnan perquai examinadas differentas pussaivladads sco ina instituziun staziunara, ina scola speziala, ina famiglia da tgira. La collocaziun en ina famiglia da tgira n'è betg la tscherna optimala per mintga uffant. Perquai dovri sper las famiglias da tgira er ina purschida adeguata d'instituziuns. In'alta qualitad da l'assistenza e da l'accompagnament da l'uffant confidà è da muntada centrala per che la collocaziun grategia. En quest connex han il bainstar e la protecziun da l'uffant emprima prioritad.

Uffants che ston vegnir collocads ordaifer la famiglia mussan – sin fundament da lur biografia savens difficila – mintgant in cumportament spezial. Quai po esser ina fitg gronda sfida per ils geniturs da tgira. Perquai n'è betg mintga famiglia adattada sco famiglia da tgira. L'examinaziun cumplessiva da la qualificaziun, l'accompagnament professiunal e la prontezza dals geniturs da tgira da reflectar e da sa sviluppar vinvant èn aspects indispensabels per il bainstar e per la protecziun dals uffants da tgira. En il chantun datti actualmain paucas famiglias da tgira ch'èn vegnidas examinadas pertutgant lur qualificaziun e che spetgan da dar dimora ad in uffant per tgira permanenta.

Tar la dumonda 2: Il dumber d'uffants che vivan a vista pli lunga en ina famiglia da tgira era l'on 2021 tar 81, l'on 2022 è el s'augmentà a 105, l'on 2023 è el stà tar

97. L'augment da l'onn 2022 stat en connex cun ils uffants da l'Ucraina ch'èn pervia da la guerra fugids cun parents en Svizra. Actualmain (stadi: fin da settember 2024) vivan 70 uffants a vista pli lunga en ina famiglia da tgira, 15 uffants passentan fins d'emna e vacanzas en ina famiglia da tgira ed 8 famiglias stattan a disposiziun per l'intervenziun en cas da crisa e per timeouts.

Tar la dumonda 3: Igl è la finamira dal chantun ch'ils interess e la protecziun dals uffants e giuvenils stettian en il center tar las collocaziuns ordaifer la famiglia. Las personas spezializadas qualifitgadas da l'Uffizi dal servetsch social cusseglian ed accompognan individualmain e tenor standards professiunals las famiglias da tgira e las personas interessadas. Ellas porschan ultra da quai mintg'onn in'occurrenza da barat e da furmaziun supplementara.

Tar la dumonda 4: Per il svilup a lunga vista ha il chantun analisà, quant enavant ch'i existan differenzas tranter la situaziun actuala en il chantun e las recumandaziuns da la Conferenza da las directuras e dals directurs chantunals dals affars socials (CDAS) e da la Conferenza per la protecziun d'uffants e da creschids (COPUC) davart il collocar uffants e giuvenils ordaifer la famiglia. Sin basa da questa analisa da las differenzas èn vegnids iniziads differents projects per realisar las recumandaziuns da la CDAS/COPUC. In dals projects cumpiglia «Novs mecanissem da finanziaziun e promoziun da la qualitad per famiglias da tgira en il Grischun» e vegn elavurà cun sustegn d'ina expertisa externa. Actualmain vegn redigì il rapport final. Differentas mesiras che resultan da quest rapport vegnan a sviluppar vinavant il sector dals uffants confidads en il Grischun. Per exempel duain famiglias da tgira vegnir accompagnadas e sustegnidas tenor lur situaziun e las cumpetenzas da tut las autoritads involvidas duain esser scleridas. Quai vegn a simplifitgar la collavuraziun per las famiglias da tgira. Plinavant duain vegnir adattadas las directivas davart ils daners da tgira. Ina nova pagina d'internet duai simplifitgar l'access ad infurmaziuns ed ad in emprim discurs. Per realisar las mesiras elavuradas vegnan ad esser necessaris meds finanzials. La Regenza quinta, che las mesiras vegnian a render pli attractiva l'activitad sco famiglia da tgira ed il medem mument a mantegnair la protecziun ed il bainstar dals uffants.



Il president:

Dr. Jon Domenic Parolini

En num da la Regenza

Il cancellier:

Daniel Spadin